

康對山先生集

康對山先生集卷之二十一

擬狀議

擬臺諫奏免校尉刺舉臣下

臣惟三王以禮使其臣故功烈高尚後世莫可京也  
陛下何不一切以禮自居使臣子人人自安以相成  
陛下之功烈使並名三王同符二帝傳之萬世乎夫  
臣之於君非有父子之親也遠父兄辟鄉土非有親  
戚倚賴之樂也動之有法行之有制非有優游自恣  
之趣也然而任為斬刈流徙而莫為之怨勞瘁其職  
而不敢安者此非必

陛下之聰明家照而人覩也孔子曰君使臣以禮臣事君以忠詩曰投我以木瓜報之以瓊瑤其君臣之義而施報之禮所由於

祖宗之制者遠也今奚所制而輒廢

祖宗之舊變立新式使臣子人人疑懼狼狽莫能自盡哉夫微疵小過此雖賢聖不免也況中才之士待教而善者魏文侯戰國衰世之主尚不忍以二卵棄干城之將況

陛下之明聖乃數以微過細事困辱豪傑後何以為訓也夫文書期會失報非鬻賄獄訟大壞國法也參

詰簡寡求以勿濫無告非圖蹈忠良也臺諫止息時  
弊非引之已歸而後利也乃皆許校尉舉刺若覓賊  
首此何為也夫公卿大夫縉紳之至貴也校尉廝後  
之至賤也公卿大夫校選之於鄉黨進而策之於大  
廷慎而擇之於天下之公議非若校尉但以戶徭僉  
派也乃其制行知識悉為其所制臣以為大舛也竟  
以禮任其臣故羲和四岳效其職舜以禮任其臣故  
禹稷臯夔奏其功彼其蹟非不崇而智非不逮也乃  
不聞有家緝戶舉之事者彼固以為不可也公卿大  
夫者與上共理治道而致之民者也臺諫者與上及

宰相共論治道○加之駁難審固而授之民者也○古之人官盛任使忠信重祿以待其臣尚恐不得其心○故於是有燕饗之禮○焉有體悉之惠○焉有推引之讓○焉○曰○母金玉爾音而有遐心○曰○人之好我示我周行○其義如此深而禮如此厚也○今又旁求博致○惟以能尾萬一之謬○則欣欣然遂以為快○一繫詔獄則不可更辨其寃由是言之○雖有伊尹周公之忠○固亡由申也○夫中才之士因所施薄厚為效者也○非皆賢而有行也○彼見上圖幸其罪隙則必巧為規避而逃之○是故益相誣蔽以奸其上也○

上雖終日不食終夜不寢以勵精求治尚可得乎

陛下何不如堯舜之已事使臣下得人人安心毋肯  
奸上欺罔也夫校尉者非有士君子之行也編之行  
伍非有下士之貴也增威以劫衆非有禮義廉耻之  
節也有權臣專操國柄乃始用之不知

陛下大明光顯之下何乃猶爾也夫忠佞賢不肖之  
辨臺諫之舉至嚴也唯

陛下留意保惜一以禮裁之雖至亡行者皆將修飭  
其身願效

陛下任使矣况嘗盡心於事毋擇其生死者伏惟

陛下圖之

擬論近臣太重狀

臣惟天下無二大有二大是二天子也故聖王慎之  
毋使有專臣焉今

朝廷政刑之重一切委之近臣以為之執而近臣者  
又播弄威德更壞綱紀天下之民無復知有  
陛下也此不大可懼哉

祖宗締造王業若此難也民望

陛下仁恩覆育若此勤也

陛下以狗馬藝伎之事欲自適意而以

祖宗天下之柄付之匪人至使天下之人不復知有天子是豈

陛下善為暇逸計哉

陛下誤矣伏願亟收其政而早圖之否則不但二天子而已也○憂國之言勿復自忌伏惟

陛下圖之臣冒死謹奏

○擬廷臣論寧夏事狀

臣等伏蒙

勅旨令畫寧夏事宜臣惟諸司所論但係一偏未盡事體昂錦等既戕害守臣推立寘鐺逆事已著若從寬



藏待其自消理既無事猶訓方來各鎮以此承之又將奚可雖

陛下不忍生靈之厄亦必出師務盡勦絕以斷萌蔓誠不宜如此之議輒俾城壞自貽來懷

擬廷臣因寧夏事計今所宜事狀

臣等前日所論寧夏諸事務在勦絕元凶者緣見被害守臣雖略施行欠當要未大為不道以絕衆心今法度久弛綱紀失序各邊之人萬一相視倚藉陰濟兇私又何為禦故務絕根本以杜方萌然猶醫之治病之標也而其所為病者臣以倉卒未之及今孽者

已平兇者悉獲標病少愈矣雖可坐視無事不治其  
本也伏惟

陛下察之

祖宗制為法度以整齊天下之衆至嚴有理也至順  
有實也至詳不亂也今日執事之臣乃一一取而紛  
更之使天下之民若瞽矐其耳目無所視聽持守視  
朝廷官屬若視大盜橫兵此何以計也夫其悖理傷  
道者臣難以徧舉也藉沒之令非謀叛及大逆不道  
者開國以來未之或行也今軍民之家有放債於官  
者及行使低銀及銀匠傾造七八成已下者一切罪

以藉沒此其情有可恕也而輒罪之如此前者侍郎  
錢鉞特請王府祿米以便河南之民耳乃為擅變成  
法沒之都御史強珍之子即射利賣鹽土民有力者  
悉可自行亦何必勢要之後也乃並夷其先臣之墓  
沒之尚書秦統歷事累朝功在社稷以勲以舊以貴  
以賢八議有其四也其子置樓禦盜比關東軍民但  
有貨貨之家皆爾也人告其為倣効內制沒之不知  
此三家者為謀叛律耶大逆律耶苟使在廷之臣非  
人類不念其身其子孫則亦已矣苟或念之將不自  
靳其忠愛之志耶

陛下又何恃以為治也侍郎王儼給事中任良弼一  
為查驗內庫陳布一為陳言雜支陳布以恤民情皆  
當親見其弊覈知其實者也顧其意豈令歲歲如此  
以傷內庫之財哉乃悉責令遠戍遼外蕩析其骨肉  
此比真盜內庫之布以為已有者何如也平江伯陳  
銳功臣之後世有免死之券以怠慢校尉誣刺多賊  
遠戍障地遺其老母徹夜悲號聞者墮淚於邑更相  
扼腕死罪尚可救也而賊罪乃如此邪又都御史張  
鳳侍郎馬中錫劉憲劉纓張泰崔巖等俱以巡撫地  
方查有浥爛剩餘糧草執繫來京備辱萬狀復責倍

償轉折數番若制狗馬人不忍見劉纓崔巖張泰以  
有人幹請得免其償而爲中錫等鬻破產業沽易子  
女折挫數年乃克歸放然猶未也劉憲何罪至於杖  
殺獄中出屍狗洞蟲集於膚衣不被體婦人女子兒  
童走卒見之未有不掩鼻呼天槌胸喪氣者也夫理  
財足國有經紀之道一定之法也即有侵盜守主者之  
職也而以重困大臣摧辱豪傑彼豈斛斛而量鎰鎰  
而計邪今有事於糧餉者皆巧避文法之誅而厚為  
欺罔之計求其數曰已支放盡絕也視其倉塲則洞  
然空也昨使寧夏之役尚未妥帖則靈州花馬池近

寧夏諸路又何以居士卒而俟其賊也夫執事者之志豈不精也法豈不厲也而顧交相欺罔不若其所圖欲以充之適以空之欲以固之適以散之若爾數年則陛下之事又可知也

祖宗之於國計其慮顧豈不若執事者之精也每不過求於人情之外者誠以其所有難也父命子以貨而為之子者尚從而私之況乎非有父子之親者惟祖宗深知其必至每事輒過為之備以但責其用勿乏而已故財用恒充而不窮事恒集而不廢夫財恒充而不窮事恒集而不廢雖三代之聖王惡可加也

剩餘之虧折固非正數之減少也。汜爛之所亡固非  
侵欺之可比也。為按察者稍以責之監臨主守之人  
尚以為甚酷也。而以加諸巡撫大臣此何以為辭也。  
今執事者之子弟皆高官厚爵過於功勲才德之臣  
萬萬。彼嘗有何功何賢也。執事者日惟不足又徧求  
其疏遠之子弟官之。奴匠服事親厚而相私者官之。  
嚴勢所至府部大臣莫敢正目也。彼以言官薦舉骨  
鯁之臣謂為出位而厚譴之。此何為也。文書有徧審  
之謬。消注有錙銖之差。即詔繫而嚴答之。削遞其職  
摧殂其命。至不計公私之罪。千石百石之罰。勒之遠。

至邊服離蕩其故業使不保其妻子父母古之人察其心而體之猶恐其莫肯為用而又為之奪耶今官自六品以下歲祿之入計不過七十兩二品以下歲祿之入計不過三百兩而居室衣服男女俯仰之類交遊餽遺之接皆是乎取之庶直守法之士尚多妻子之相怨而又以罰耶夫功伐之臣守其世業恐墮其先德姑為隱忍以保全其官職也而才德之臣乃見行可而仕者蒙被衰抑之辱如此彼豈不欲卷而歸耶執事者又以他法拘制其命脅之以必死鉗之以無怨故身在朝堂之中如厝烈火之上又安有精



白心以對

陛下之職業也其頑鈍無耻者又從而竊附執事之門逐聲憑勢自固其身恣率其情罔循朝度鬻獄賣官妨賢害正無所不為無有不至而執事者反以為賢而數薦之

陛下陛下亦且信其賢而用之凡所以壞

陛下之事誤朝廷之政者皆此輩與執事者為之也頑鈍無耻者用事於上而才德之臣扼志於下欲天下之不亂惡可得也軍民雜處京師固以

陛下天下之主萬民之父母也執事者百計而逐之

京師之民無有不怨望

陛下以為

陛下知而使之然也而執事者之門逋臣逃民靡所  
不有又未見其有能去也私門之姦亡以為制而來  
集之民反以為賊虜而疾驅之

陛下何以主天下也民固有以先世移徙及戍衛京  
師者其稱述故里者示不忘祖也乃離析其親戚墳  
墓遂歸故鄉若民人掙出境外交結仇虜之律而財  
帛子女一切蕩失雖桀紂之世亦未聞若此也豈盛  
世之事哉在逃軍伍以主管之官剝削太甚而執事

者不責主者之惡反連坐親戚鄰佑之罪京師之人雖同戶莫之知其誰也而又責之親戚鄰佑之遠其相聚而詬怨之夫豈其無狀也古之人弭盜止姦刑其所固為而原其所不得已今之盜者乃盡其不得已也乃不自其不得已者為之區處安輯一切不問小大強弱但有盜者即全徙其鄰佑親屬之人彼鄰佑親屬者何罪也茶鹽之利民之所必用

祖宗立法但以禁其甚耳今不問升合多寡即有犯者並索文引左驗彼升斗合勺皆可以有引也故天下之人重足而立側目而視圖變懷亂不肯馴順固

非百姓之罪。今在外而治民者，畏懼執事者之禍，已厚求於民，以結其歡，而暴橫之斂，歲無寧日，而

朝廷又以嚴刑峻法，陰伺其後。古之欲民之信法，尚數數申詔使之自改，而乃陰伺其後，以必中之。此雖申商之慘刻，不為也。而以

陛下仁聖之世，哉古人之言平易近民。又曰：用其一，緩其二。今京師無用之人，溢

祖宗額制之外者，不下百數十萬。坐食東南之財，而不知檢方且務為征歛，以赴其用。設有姦回不軌之民，如勝國時陳友諒者，

陛下又將卑辭以倣運耶邇自丁卯以來今日督造  
明日催織又明日採取使者相望於道未有空歸者  
也東南之民顧豈皆甘心耶直朝廷靈聖懾伏而不  
變耳即一但有徑澤之警

陛下總不自愛如宗廟社稷何哉臣故以善處寧憂  
之事猶醫之治病之標治之固安不治雖病不死而  
此數者則治病之本不亟治當在膏肓不病亦死亡  
可救也臣等世賴國恩有主辱臣死之義故不復忌  
諱輒布愚衷伏惟

陛下察之圖之千金之家尚百方保護恐失其業而

陛下所承之

祖宗者盡九夷八蠻之域皆所有也宗之何坐視其  
弊而不救之豈不深可惜也今天下之心雖傷而未失  
也

祖宗之制雖紛更而具在也英雄豪傑骨鯁脩直之  
士雖廢格擯斥而猶存也

陛下一旦勵精為之則是數者舉集而湊矣失此不  
治非臣之愚所能識也

○鑄錢議

臣竊以事有不得已而始為之者猶必盡視於情之

所宜宜矣終或有窮焉則亦未免病民而不為便錢  
法本歷代初造中衰之際財用耗乏不繼姑權宜為  
之以稍補塞焉爾承平之世財有定取用有定度柰  
何可遽起乎夫所以遽起者臣知太倉銀數不充諸  
邊饋運不已也然其事勢所至臣恐有五不可者使  
錢禁一出小民不知上意所在必相鼓惑以為將廢  
歷代所制市者匿收者散相易者不相信得者不以  
為有雖散之於上而下已疑懼而不受矣設有他事  
偶起

朝廷即欲嚴法以驅能易以用乎此謂一不可人居久

靜而無所擾則蠭蛸相雜人心久安而無所拂則誦  
詐相起百姓逸居無事朝夕所念惟財利是急今以  
鑄錢彌之天下彼肯兀然守禁而不盜鑄者邪盜鑄  
不已則必以法繩之嚴法之際官吏又緣以償憤報  
怨民則有死而已況利之所在人必趨之示民以利  
而又繩其為盜恐殺者日多而鑄者日盛也此謂二  
不可況事安於相習疑生於驟見諸邊之民習於布  
帛銀穀之交即使易之以金彼且疾痛不欲以為無  
用也今以通於諸邊有不愕然駭耶於此固有不可  
以法相迫之勢矣然尚無足懼也使給邊錢糧一切



以此用之則大可懼矣北虜犯塞邊餉匱竭丁運大起且不足繼況前此只收銀粟與布無妨於用今易之以錢則能可以不懼乎此謂三不可且銅炭非常積之物賦之所取亦有額限需之不得有司必將別為之所夫苟別為之所有不緣以求致乎今民安於無事奢巧相競窮乏不克常賦所入尚煩縣官嚴限而不能集而又益以此哉此謂四不可民安而動則驚惑煩厭行錢之地習於舊錢之貴而新錢之賤一旦聞以鑄錢行之則必以新錢不可久用即使畏法勉從倘盜鑄之令殺人繁多

朝廷不忍百姓之死革新錢不鑄則蓄鑄錢者豈不  
深以為誤已也法不行嚴而使之行既行而又輒止  
竊恐法之不可以示民也此謂五不可夫五者之中  
三不可為重而五不可繫治體為尤重省財足用自  
有經略固不可專於一錢之有無而已也此不之已  
時尚得已非臣區區所能定論也謹議

○論易置狀大事宜

與王東衡

計事者誠貴詳慎周遠倉卒之際雖固有如意者小  
如意率小敗大如意率大敗此雖聖人復起不能易  
也何也天下之事其衆若牛毛其大彌宇宙其細極

纖耿彼以倉卒小慧謂可進之矣其道固無有弗敗也今關中雖不罹兵燹然山南之寇煩餉數年矣老弱枕藉於溝壑之中山南至於今未平也而北地上郡悉數歲稱歉貧民剥樹膚發草穀以爲食寧夏雖新淨逢豎一被狼藉倉廩虛歉矣延綏甘肅諸鎮虜數梗道居者不得耕牧挽運者不得輪送其害盖數倍關東也直未焚城邑掠婦女殺黔首似安平爾而軌事者不思久遠亡安遂亡意輕忽行事罷費百姓如彼彼固飲藥昏眊矣此其民何罪也故不避僭踰輒上與兄計夫城北之鬪直張氏十數人爾合邊腹數百

之兵晝夜圍捕但獲其三四人餘皆冒圍而出官軍  
物故與之相稱彼且未有劉齊之盛也至知府不敢  
遽出祀厲盛借兵衛若備大敵而關東之賊鄉嘗欲  
西望入關矣關東之勢豈如張氏甚少耶執事者何  
不近以此慮也曩聞兄與鎮巡諸公極力區處防守  
要害修繕城邑訓練兵民警策官吏即承命者未必  
盡如約法然亦今古恒事民不勞事不廢也民私若  
曰即莫之盛亦可以粗守矣此備之道事之理然也  
故選置壯夫肄戰修具者凡以為此而已今執事者  
徒以遵官崇階握恃朝命抗猷群列悉取其約束而

更之罷狀夫之置寵無籍之人令郡縣另擇光棍游  
手者食以精廩給以利器又汰不堪供役之戶徵取  
銀十兩資其柴束此法一行關中之禍成矣故無待  
關東也昔韓德夫以此施之真定彼時民方承平畏  
法愛念性命也尚嘒嘒以為厲已而勝盜勝盜者害  
過於盜也其施於今雖三尺之童熟知其不可矣夫  
民自賦役之外瘁瘁崢崢勞苦終歲莫能養妻子給  
喪葬也山南及三邊數歲供億之費又沓沓相仍若  
疊緯積蓰小民懷亡思亂之志靡有弗及矣乃又以  
此重之夫常役之制今年力差則明年銀差百夫之

戶銀差歲不過十五兩或二十兩而舉族踰餓寒矣  
彼不堪供役之戶則常制不過一二錢多則五六錢  
又多止一兩耳而益之以十兩不知十兩者為力差  
筭耶此雖盡誅其戶悉繫其妻子有不能也彼又何  
以給光棍游手耶夫民之至無賴不可訓導為善者  
世之所指為光棍游食者也人之至親莫如父母篤  
愛莫如妻子而光棍者方且不顧父母妻子之養今  
以官府升斗之會責以守衛城邑之事其故心宿志  
又固有因是以感觸他移者矣一旦寇至吾方束手  
孤立借効於彼彼亦恃其馴練之素驕悍於我促之

則心違客之則事敗彼誠兩顧於寇我之間在我者  
養無太厚動有峻法而在彼者恣意致欲罔不周遂  
寇未之入而彼先為內潰矣故於是雖有頗牧之將  
不能為之用也非不能也勢不能也譬之虓虎在柙  
苟就飼喂稍若馴服一出其檻必反噬飼者此會稽  
之守所以嘗項梁之劍也史記所載除犖創草昧之  
始不論有邦之主經畧之故自皇帝制兵以來訖於  
今日僕亦嘗究極之矣未聞出良民進游手以為武  
者况今日群盜政彼曹輩也乃又以此輩預養而待  
為之資此育瞽女子聞之而大笑者不知何所為為

尊官高年之士及亟趨劇行如此彼劉齊者將已鼓  
掌漉酒而私慶矣夫內失庶民之心而外資盜賊之  
援危國亂邦孱臣愚士之末計也盛世公卿乃望是  
以弭盜非愚則痼矣兄於此何不急為之圖以安其  
衆此聲一揚向之壯夫必欣然散去如釋負而游手  
無藉之徒攘臂爭先矣壯夫散則武備廢而盜無靳  
志游手無藉之徒先則孽禍蔓而敵有厚資若然則  
關中之事去矣夫事本易集而效本明著也古之人  
動難於老成持重之臣者以有深遠長顧之慮行易  
而効長也今不求之於其易而索之於其難不圖之



於著効而望之於隱福此妖人燒符致鬼之術殂身  
死軀之道也或曰古之興國之君由屠沽盜賊與之  
成事者多矣子以將手亟絕勿用不已過乎曰其大  
畧吾已言矣此政所以塞其釁也夫特收良民習戰  
馴守者勿但善戰可恃又以陰奪將手無憚之志也  
故以戰可以成殄寇之功無戰不失其守家即又萬  
不得志必懷愛妻子屋廬田畛死不為亂此孟子所  
謂有恒產者有恒心也將手之徒則異此已勢孤則  
俛伏放下甘為人役有大盜小警則趨順搗摸無忌  
親故甚至因財而異父也若教之為兵資其食力養

藉以藝有小寇即亦可以小有勦績大寇至刼仇姓  
殫恩家反戈徃迎矣何也戰則不可勝敗則受罰罷  
食又失利也所謂無怙產者無怙心也今天下幸獨  
關中無事東盜欲窺關中有無不可知然古用武之  
國不可不慎也惟兄速已其事而函圖之賜不肖以  
闌闌優遊之樂則莫大之幸矣况百二之險萬萬之  
命乎

對山集卷之二十一

康對山先生集卷之二十二

書

與彭濟物

數年不覩光範偶辱過問卽甚慰甚慰然又倏爾而別此情如何明日逢德光道及雅愛云云此誠斯文骨肉之至他人誰肯然者感灼累日然竊有所未安者因公知我厚故不避訶責輒布上左右惟公察之聽之僕自庚午蒙詔之後卽放蕩形志雖飲酒不多而日與酩酊爲事人間百事一切置之此不但信於鄉人妻子奴僕也蓋素性疎懶偶因官秩羈繫數年

若招豚擘鷹而一旦得此中心之快實有人所不知而已獨知之者自東方多事以來聞其驍傲無狀如彼卽或奮然有攘臂之意隨復自笑自詈以爲狂奴猶爾不量卽又飲酒散髮箕踞林麓此其性習之已成激之不返雖三公之貴刀鋸之辱不可奪也況數碩之粟半幅之紙乎僕自幼支謾無狀性好是古而非今始仕時望見

先皇帝寬仁大度卽自私擬以爲臯夔稷契之業可以復見於今而狂放易言畧不修飾至

皇帝嗣位之後又見其英毅果斷益喜益貢以爲

志當究於此一時交與之士反覆輕易不檢惟僕言  
是是故謾論譏說畧無忌畏日就月將幾踵奇補幸  
免殺身而歸而二三者又補砌所無以為真有使僕  
含垢於有罪者之籍與不肖之人同被驅放上辱

兩朝作養之恩下累先人消介之業生平微志付之  
穢塗情苦心苟不復自愛暇日偶讀皇甫規避梁翼  
之事與蔡雖卻九錫之書喟然嘆曰彼何獨不得含  
垢冒汚而成致美節如此也又偶讀柳宗元傳曰卽  
宗元有不同於叔文然親與之交而受其職任矣夫  
身有規雖之操而迹厠宗元於九錫之間仁人志士

宜於此何如也今僕之所憂者在忽有犬馬之疾死  
丘壑之下不得伸其宿心原宗耳而區區官秩之事  
非所念慮也瑾之用事也蓋嘗數以崇秩誘我矣當  
是時持數千金壽瑾者不能得一級而彼自區區於  
我我固能談笑而卻之使饕餮嚙嶮之人卒不敢加  
於我此其心與事亦雄且甚矣當朝大臣蓋皆耳聞  
目見而熟知其然方臺諫論列之際出於一時倉卒  
未暇差別而今則又數年矣夫伊尹之輔商也一夫  
之不獲則曰時予之辜僕即非賢者然豈少於商之  
一夫哉大臣者乃忍使之雜於孫臏曹元與云云之

間邪故鄙人之心至此益放益已披髮嘯歌至於終身而不敢悔此非甘心為長沮桀溺之徒也公之意曰古人內舉不避親時之可舉不可舉非僕所知也而僕之不才污穢亦非公應舉之人觀近臣者以其所為主於此使識者苟為之言則所係於公者豈細哉今僕之不可於當世者有五而甚不宜出就官職者有二性喜嫉惡而不能加詳聞人之惡輒大罵不已今諸公者皆喜明遜而陰譏此一不可翰林雖皆北面事君而勤渠閣老門下者以為賢能僕嬾放畏出歲不能一造其戶此二不可人皆好修飾文詐偽



恭假直而僕喜面訐人未有不怒者此三不可士大夫不務修身法事之業而俱呻吟詩文以為高業見其詩若文不能不怒故見輒有言而彼方望我以為美也我以言加之此四不可與相好者接必因其職事加勉戒之詞多忤其所好彼或未從即拒而絕之以此親踈多怨苟復見其所愛者又不忍不告或又告之彼即又不從而僕又絕之此五不可執德不宏不能信之於人雖頗自好而當世談論之士多加詆謗自入有罪者之籍污穢終身莫能自潔使平日所立之志局閉淪落智高萬物之上而名陷九淵之下

於中夜竊自嘆悔不當輕易效某世俗科舉之類  
此兇溺今又不徹而欲仕乎此其不宜出者一時同  
黜之人固有不幸而被污者然罪大惡極羞於婦  
人女子之口尚十之九彼莫不覲幸僕出以爲先容  
之地而當時宰執又率崇私愛而乏分別苟欲引其  
私人必援僕爲喻是所以用僕者非必實知其爲人  
而真明其有誣也如此則是以賢者之身而爲不肖  
者之資矣語有曰君子非其招不往以不賢人之招  
招賢人如之何其可往哉今衆人雖以不肖謂僕而  
僕未嘗一日不以賢君子自謂已如此自謂而人以

彼謂已蓋所謂嗔爾而與乞人不屑者也此甚不宜  
出者二明公之意特出於一時愛念之篤偶未詳究  
及此然言出乎口通乎心明有日月幽有鬼神此區  
區平素之惻可一鑒而盡者公如覺之必信其為肝  
膈之實慨然憐我體我矣會公甚難既會又復匆匆  
不得請益而又能迎候敝邑此甚負公也諒公有以  
恕之乎臨紙惻然

與王子衡

數日之別已勝數年矣諒公同此情也華山之遊此  
平生至願况又與吾兄同之抵家後百事狼狽荆妻

痰氣發作幾於不起小女出嫁伊邇未免匍匐耳富有富者之事貧有貧者之禮父息之情誰能不爾坐此二者使不肖倉卒言兄長之前顧不得羽翼而東耳奈何奈何在省時會近山尚書濟物總制俱道雅意隆篤細得近山言深服公所以處我者有禮也近濟物以他人之謀將致我幕下昨已為數言絕之頗涉峻厲於乎彼殆以我為何人耶大丈夫出處自有禮義豈私好私與者尋隙投釁附會可致耶兄與我有骨肉之分當憫惜至此丘壑之下凡有志天下國家者豈所忍居苟有所不可則亦寧死守而不易耳

平生碌碌別無他事維此點檢最熟而又失之死無  
面目見先人於地下也蓋此又是一番波浪比之往  
日應舉不同如之何可以輕且易而言也厚齋之意  
雖喜然非實知我者固已感之矣然乘之則不可也  
去秋有一客相過極言彼所以拳拳於僕之意方在  
杯酒間僕變色大罵聲轍四隣僕豈彼之所宜論耶  
昨見自彼來者云彼已深含於我此不知僕正欲其  
含也卽此可以再見不肖之心矣張吏來甚急因先  
附此意不恭之罪吾兄想深有所以亮之稿序數日後  
當托人附上不敢負吾兄也臨紙耿耿無已

與藍文秀

伏聞寵命之至欣慰不已明公才望功勩豈一南侍  
可盡然當此之際百事破裂不忍言比之前明公身  
任安危之日又稍異矣以此甚為門下喜也敝邦之  
民數年蒙經畧得有闌闔之樂而不肖私被特又為  
深亦嘗頗忿承事秉節之臣輕忽喜變不能鎮揚國  
威殄靖妖孽虛恢越絕敢肆大言以欺天下而當時  
用事之人不責其名實輒乃加之功代德性之上以  
其小而信其大使篤實之道弗彰幻謬之徒得騁因  
以平蜀之事稍為論議據事究勳私若頗當於明公

之行用為遠贈文采雖不足綜核已有餘矣不能躬  
候行節私心懷仰何可言外具粗儀并序稿特令第  
淳賁奉冀垂存省幸甚春和伏惟保愛以慰斯民之  
望不宣

與何粹夫

二十餘年不見故人顏面書札亦僅六七還往而衷  
曲萬千尚未一及豈但可以痛哭流涕哉前日涇野  
去又復匆匆不得申問老兄郎不為踈懶我尚何以  
自謂也往年為兒栗娶漢陂女一年生子子死婦恚  
恨亦死某自荆妻亡後齒落形憊已極酸苦乃復丁

此只得從頭匍匐又求叔安季女與栗為室春初東  
邁中夏方返人生幾何顧終日了無休息古之達人  
可復若此也十年前於蓋屋彭麓買田數頃得一幹  
僕力作頗足口食其地易水稍謝旱乾之憂矣兒女  
事變歲無饒歉山居頗近名陬無詘以暇遊衍豈僕  
初志哉近得希道書云丈夫不作萬年之身亦須有  
以傳之後世某之踈放後世之傳不敢擬而萬年之  
身則劉文奎已先得之往吾兄語此甚謂不難今力  
求數年茫無涯涘肯指曲折某當倏出泥淖中也先  
述所示良竒某為此十年益乖初聞門戶頗多不知



何者為是有暇有可批示否涇野在南想日與傾晤  
來秋欲拜掃先隴就訪兩公良晤不隔想應申遂久  
旱酷暑萬萬為道保愛不宣

與寇子惇

仰聞得手教展讀數四無任媿感昨西使寄望之書  
來亦道此翁留意不肖甚隆皆知已者過為粉飾是  
以長者輒不見疑若便以為真耳放逐後流連聲伎  
不復拘檢垂二十年雖鄉黨自好者莫不耻之又安  
有可與士大夫同日語者人苦不自知僕既自知之  
而又自忘之邪此則深感爾矣執事知我厚宜必亮

此也。昔翁一時來興輒為論薦殊非佳事。執事  
倘有問訊可委曲言之。阮籍之志在日獲醕酤耳。三  
公萬戶非所願也。僕蓬首跣足已踰半世。苟得優游  
行樂。決無他想。言雖激聒肝膈。盡露誠欲安分醜居。  
不欲粧束搽抹。重為流輩詆誚耳。有醜婦被逐者。借  
隣女之飾更往。謂夫曰。曩以不修子故。棄妾今修已  
子何辭焉。其夫趨而出。其姊止之曰。一出已羞。更入  
何求其言。雖鄙可以理喻。惟執事萬萬念之。

與楊用之

海白用之足下。與足下論議皆洞然相達。靡有留滯。

此雖古人何用多讓足下年齒日盛而功效未彰竊甚怪之昔玄德撫髀而增傷士行情陰而勵志誠願足下每以至性難得為念懷古道之罕臻懲根莖之靡至絕遇世紛精詣往迹輒不可如前日逸逸弛緩以自廢也肝膈之言深信必察故爾盡布不復追悚

上遂庵先生

執事此行

宗社之慶生民之福也不肖萬萬死罪無面躬詣拜賀今兵事日繁賦餉日急各處經畫糧儲之人率不堪職勤為迂濶難集之計百姓百倍陪費不支一行

之需倘賊勢更盛又當何以山南湖廣之盜不可視  
為尋常今之求治者率弟子行當亟須丈人也詳此  
盜能老弊我師者中固有人耳往時四川湖廣陝西  
所上首級盡山居平民非真賊也凡執事所以報  
孝宗皇帝者惟此二事耳不肖雖在罷廢然世受  
國恩不敢忘此憂也初冬微寒伏惟保艾以慰天下  
之望不宣

與張邯鄲書

於公雖數素交然公為鄉里豪俊之士居官之聲動  
燭遠邇此吾所甚慕也東方盜賊薄公城邑凡幾矣

公能悍然無懼以作其民邯鄲數得無恙其係豈細  
小哉願公益加嚴慎肅練士民倡率豪傑攻城約以  
死守城危誓以死戰彼雖號有數萬然中多婦人瘠  
民精兵僅千人耳旣擁衆抗軍不能留蓄寄民而所  
過殘滅井曰金甌固有子遺必無怙飽之理此應敗  
之道也昔吾惟警邢郡返過邯鄲見其人率勇敢有  
氣吾恨不能丞尉以作其武幸聞公大抵甚慰矣况  
又有近功邪鄙諺曰莫抵其步當抵其趾夫民旣以  
覩彼之所為矣今戰亦死不戰亦死甚曉然也然不  
戰固死使力戰安知其不生邪此可以語邯鄲之民

之自固其志矣愛公甚深見公邑人亦不辭惘然  
敢告以此今之名將未有類公者也春和惟為民自  
重萬萬

與王敬夫

亡兒志文至亟與登石間兒婦楊氏食飯霜不踰時  
遂死此十一月七日巳亥事也痛徹心骨殆何忍言  
念惟此婦自五月念二栗死即堅志死節荆妻及諸  
女輩日夜防衛已極縝密乃于其月念九潛服毒鼠  
藥數七幾不可生賴覺之煩早得以投救至于今日  
每聞妻女所傳婦言其志必不肯回因諷之省厥父

母冀至膝下或以愛奪乃悔恨彌切日夜號泣欲西  
南麓公與許夫人不得已令其兄宋與其嫂舍姪女  
送之來仍以有心婦女一人常為伴侍婦至栗柩哭  
畢入內見荆妻殊有喜色曰吾謂夫已死不知猶未  
也荆妻私意其語謂予曰新婦志太不易行必有變  
柰何予曰汝但多方防衛可也翌日與詣防衛者相  
處極歡有一出者必止之曰汝出吾懼也畧不一言  
往志衆以為既見父母果懷眷戀後將無事荆妻者  
獨不以為然令嚴為環守是旦粧洗畢假言宿飯作  
渴索醋湯卧內飲不知潛帶碎砒二三兩隨飲吞盡

少間砒毒內作與侍兒登廁歸漸不能支乃誑小女  
及妾楊氏曰吾適登廁見崇身頗不佳幸與亟亟襪  
之又索醋湯今極暖來連飲三碗許曰稍可矣荆妻  
入見其色驚却所以因切疑之搜其袖有遺砒始知  
中毒亟呼家衆尋醫治之婦徐曰妾此來欲以死從  
夫遊地下前所囊物實砒霜數兩假言為金珠使姑  
不疑我今已盡服人言砒霜用醋下者百藥不能解  
恐舅姑及吾兄以藥解吾毒則大壞吾志是以連飲  
醋湯數碗可喚吾嫂來治吾後事滿門驚痛呼其兄  
嫂至因以解藥予之閉口不納逼之太急則嚙碗立



碎每藥來則輒揮去堅閉其口楔以鐵箸且曲矣齒  
堅合不啓也曰吾與飲此吾不食砒霜矣今吾以死  
為樂以生為苦也柰何以苦事逼我其嫂啓篋出衣  
皆婦近日所製以為臨死之用者無有不備與不精  
也着畢氣絕予痛哭幾死以為曩者栗初死時情激  
心裂痛莫可制其死或易至於歸謝其父母又三月  
餘矣父母劬勞之恩眷屬繾綣之意顧不能一移其  
初志而不迫不怒從容就死如此古之達人志士不  
足與之先也頽子為孔門高弟夫子特稱其三月不  
違仁而新婦少年女子耳乃其志久而愈堅彼豈嘗

從事于學問若士大夫孳孳疊疊者也其天資之高  
父母之教要有不可誣者矣荆妻言新婦數向予言  
古今賢女故事云得之其父兄講說今日之死豈非  
聞之于耳卽感之于心而不忘耶夫人食利藥少許  
必疾痛萬狀新婦服砒其多比死顏貌安舒畧無倉  
卒豈鬼神陰以相之使其毒不內撓正色以斃也栗  
為人頗靳非辟不正之行嘗曰姦汚殘賊天道未有  
弗與還者故行年二十有二曾無一毫非禮之動乃  
天畀以良妻若是天信有徵也哉此婦與令愛德性  
甚相若適亡兒各兩年雖媼嫗不熟其面也記曰內

言不出外言不入栗之而婦其廢幾乎昨新婦自靈  
寶至出鞋二緹壽予與荆妻孰知其與舅姑為永訣  
也因語楊生楊生云妹平時以二物曾壽家君與家  
母殊不知厥意所在今以此誠所謂與之永訣耳於  
乎痛哉茲乞執事與新婦別撰一志備其美德俾將  
大石通刻三誌納之于塋以示不朽昔栗欲以一棹  
通葬三柩則栗之志亦可以無憾于九泉之下矣兒  
女之事累兄甚多敢以初生狀隨書附上惟執事念  
之憫之臨楮泫然情不盡布伏惟尊照萬萬十一月  
九日海再拜

與唐漁石

久違光範不勝懷仰之私春中以華山之行赴省城  
留滯月餘某事所司明知冤苦皆引嫌弗究君相極  
力明刑于上而天下依違之習自若舍茹冒污僕分  
所宜耳尚何忍言伏惟執事推賢愛才之心休休無  
已方內英俊莫不鼓掌相慶以為將有拔茅連茹之  
漸而太平之幾誠在是矣其遠且踈者或無以表見  
于鑑鑑之下使大璞不登私竊忿焉每有所見擬議  
欲明輒復中止思惟執事之愛郎何可嫌昨在省見  
山東進士李開先者資性英發識見超遠文藝精典

哲臣所難治體通達後輩希覩心殊重之瀕行因與  
太微蒙溪洎韓馬河濱諸公送之東郭之外至今不  
下鄙懷者凡三月餘矣值使草草用貢台聞天下之  
善士如開先者又不知有幾人惟執事備訪力求使  
勿淪于常流則今日得人之盛盖有凌跨古昔炳耀  
簡冊者矣孰謂非執事之功也後生末學如開先苟  
得大人君子作興砥礪于上將來所就自僕觀之可  
謂國士之無雙耳惟執事默求其為人之實而加之  
意實斯文至幸聞被欲來國子學職是又以中書付  
仲默特士付昌穀殊可惜也早夏苦熱伏惟保愛以

慰斯世之望不宣

與李伯華

仰間辱書教喜慰何已奉讀一過驚恨萬千愧不具  
羽翼而束也世事皆何足言惟策厲以慰斯文之望  
僕之至幸也此病僕少時亦有之正心脾之氣不足  
所致常服平補鎮心丹得效甚捷可試為之聞欲求  
國子學職謂伯華自為則可然方今之士孰有可與  
伯華班者俾之自授散地將非世道之不幸耶前嘗  
有一書與當塗君子論之矣僕所願在伯華登法從  
備顧問與上極言天下治亂之故使堯舜之治復見

於今日而僕得老死林壑休休終身以歌頌太平皆  
將為伯華與君相之賜而顧如此何邪人來草草附  
問惟萬千保愛不宣

為鄉人論銀禁書

泉布貨財通有無便百姓而已惟民不能以皆繼也  
故以泉貨易布不能以皆耕也故以泉貨易粟聖人  
之意苟使農末相資而不相病如是而已此縣自國  
初至今惟納邊錢糧方用足色其餘用使常五六成  
耳八九成則太高者也今欲一切悉用足色克使貧  
者典衣服賣器物以十得五尚不能得常行六七成

謂為通行之物今被撫公之命市井之徒動輒捲桶捲桶者此間足色銀之別稱彼貧寒之家安能有捲桶邪往歲農間之時每柴一駄止直常行銀四五分再無過六分者以足色沽之四分則二分六分則三分也苟有積陰或加至一錢及錢一二分亦惟常行銀耳貧家卽求一駄之價尚變易未幾被百方訕訕而猶不能況又勒要捲桶彼捲桶者豈尋常易有之物邪撫公之意以兩直隸山東河南江淮等處但行用細絲銀蓋此數處錢法通行故不得不用細絲今若能使百姓如彼通用錢法則可不行一人而自無低



銀矣况民溺於所安而難動錢法又未可遽行此銀亦豈能遽變行錢之地每分得錢六七文可幹六七事行銀之地每分不過幹一事二事而止故低銀當常通干不行錢之地者其勢使然也今假銀白銅彌滿市肆乃縱而不禁顧獨禁低銀豈非不思之甚耶今行律之人顧物論直此以與之彼以受之無相疑者誠以為自便也一旦改而不行窮居之民束手無計不為掠則為竊欲行法使民便乃不惟不便而又令之掠與之竊非所以計度民事者也納官之銀用足色者妨侵盜轉換黃綠為姦耳足色之銀豈可食

者耶苟能以通有無資農末則聖人於此亦信其意而已不深強之以所難也故曰聖人緣物順情其力不勞其道恒伸此或其一耳偶聞百姓喑喑故敘此意告公惟有以察識此意付之施行則可以無煩程限恒困使者而坐享其道矣仍重禁白銅假銀則市肆不欺農未有賴或得計事之益也

答王汝言書

曩者仕宦時竊見世事搶攘以為非甚難辦也特執事者未嘗少加之意故云云耳每遇士大夫率肆言毋諱不知觸人違怒已厚乃竟以罷官至罔為姦人

之黨交遊諸公或以書責我宜改易往輒得書後大笑索酒曰我罪蓋如是然我何能改也夫予不能行事於世以誅其姦乃并不得肆論其短長哉夫善與惡是與非其數較然明也執事者不以為意而槩與之則反手倒持惡民興善理盤風俗衰詐偽起子弑父臣弑君母不亟為是猶可委而弗究邪天下之事雖貴執者所共壞然豈盡持執事者之手今事之比較哉四海之遠兆民之衆事為貴執所制者要不可以十一辟之惡風疾雷雖至盛必無終日委而不為而謂非我所得專謬矣請以廖鑑喻之曩在河南口

嘗屢遣人誅求郡邑矣其重求不過千金郡邑科歛  
千金只一項耳其錢穀轉移詞訟難易約束流滯彼  
豈曰治此則妨吾索可置勿理也不才之吏各欲自  
肥私享則是數者鈎致無不至使反此心以正理易  
治卽是數者悉可以裕窮民稱良治矣士大夫平居  
動以古人自期謂事直未當乎若云云我當如何如  
何旣當乎矣而又委以執力此非真有為民之念者  
也劉養和以犯廖去矣燕憲清帖耳奉廖何乃亦去  
矣二君同以廖去其高與下美與惡奚啻天淵冰炭  
不相侔也而士大夫乃猶舍正路而弗由豈不大可

哀耶昨常守德來繼燕又視養和為烈矣彼廖氏者  
受侮半年何不更用前計以耐守德而甘心若是其  
道固有所難也今上無貴勢之撓下無執友之托臨  
事泣民心知其惡逆而隱忍含糊善不加恤惡不加  
警使無狀之民如群虎負隅而良善者卻足自廢有  
天日之明官長之設刑法之禁而身制于齊民不可  
左右朝廷所以建官分職之意安在平日鄉黨為善  
者率云某為某事嘗言其不利今已然至此乃猶不  
見其賢者固以為時有所未至而不賢者將又因以  
轉而不善矣此予所以瞋目于執事之臣也大文奴臣

惡犯禁嘉理恬不為恠小民罣誤冒法則鑑計毫數  
洗垢索瘢持此而欲天下治平胡可得也吏長姦民  
侮法二者國之大弊也今長姦之吏盈滿仕局而莫  
知所懲侮法之民桀踞鄉里而莫知所畏此當塗君  
子之深憂也昨過貴邑見事執百爾狼狽以深恐懼  
乃續聞公言云云及叩之在塗又有過者乃嘆守令  
所繫之重如此使郡吏一切如貴府縣吏一切如貴  
縣長此安極今日偶見敝縣一事為上吏發至劉令  
以病不得理其丞但惴惴奉承唯渠兒所恣意耳然  
僕向為常道言之不知卒聽否也安得公在蜀時風

致為一洗耶昨僕謂弟姪輩曰汝言言有內艱報尚  
能戮兇省祭使之在官數年不知又當何以而此時  
列郡太守皆碌碌不足為汝承雖美才盛年又姑息  
寡力大抵時運使然非人力所能也

與姜武功計處樊仲等賊攻犯事宜

承諭曲盡計度滿城及郊外生靈盡荷德沐愛比之更  
生然有數事輒令錄上煩亟為斟酌施行則所益不  
細曩時蜀漢征勦橫及無辜正坐執事者不能先物  
審處以致倉卒失措雖悔何逮昨日得賊馬者卽以  
馬賞民人人思奮恨賊不卽至先賞罰之際果能倡

勇鼓氣如此有不戰戰必勝也惟公亟求入操之人  
下場操演昔种武功懸金錢誘人習射已有益於宋  
矣何今異昔耶一擇精力之人可把城門盤詰姦細  
及昏封閉日出方開若有面生可疑之人卽送官查  
究遇夜有公差人至亦必遠瞭同行之人多寡然後  
索其所執關文牌票果是真實方令守門官布列執  
兵之人開門照數放入蓋恐賊軍乘機夥入不得不  
謹也一上城急令上城之人逐名搬置石子在上每  
人以三五斗為率以備緩給仍令每五人具手銃一  
把火藥銃楔俱要完備精好萬一賊來攻犯城池倘



石所不能及者則濟之以銃賊不敢遽近矣一再擇各處鄉村丁壯者令編為群伍除大密村鎮自為防守外其耿小村坊宜三五處相結俱要器械精好垣堡堅完不惟遇賊可以剏拒無畏而官軍喜功妄殺者亦不敢肆其志矣又於境內軍屯寨聚摘取精力驍勇之人令自備什物編為行伍與城中良家子弟及機兵民壯立番演習銃射居前兵刃居後務令純熟齊一然後用之出奇勦賊則所向不怯全功可致也一各色入操人數既令衣服整齊器械精好矣仍須編置行伍或十人或二十人俱要先立隊長建設

旗幟必其人相認隊隊不錯然後令之審金鼓之音識進退之節遇有緩急號頭一舉各相檢察毋使姦細乘機竄入以生他變又與嚴立約束功者必賞罪者必罰則水火可蹈生死無避矣更選前鋒之人八九十數給以紙甲令之衝鋒直前則後軍望之自無不奮力爭先矣久之則人人敢勇遇敵則摧一可當十十可當百有此千人雖橫行匈奴可也況無習草竊哉一各處鄉夫除修壘城築者待其功完放回外其餘應點壯丁欲審視有無器械宜令該里里老先逐名點闡明白的無面生可疑之八參錯頂數方

許上堂稟過令村長以次領進點視若里老胡突槽塞不行用心致有踈虞先反覆申喻以軍法從事令下法行姦細聞之自不敢舍命夥入而遠近皆齊矣點視已畢領打關防就令出門各回村鎮瞭視緩急收拾禾稼協力防守則農事不失武功丕振壯丁既不至玩愒歲月村坊又得以互相保助矣其出門之後仍要把門者赴堂稟報某里壯丁若干人某時出門則凡在城內者皆係有來歷之人而一切訪覘姦細無復容身之地矣

與乾州太守趙君書

地方孽人興亂邇有二十餘日往來興平西南諸村  
哨聚村民椎牛掠馬肆為大言畧無忌憚當塗君子  
雖已識其將然而施行處置尚蘊而不發使不肖輩  
如坐烈火忽見二十一日尊票到縣乃知攻擊城邑  
矣當此之際若非執事事有素定則倉卒相值何以  
為策州一破賊勢蠱起素被蠱惑之人觀其行事罔  
衄不知從者幾千萬人而東指醴泉南嚮敝邑勢若  
破竹夫復何忌故今能不損一人不勞餘力坐致平  
定者秋毫皆執事之賜也已謹具書當塗備陳始末  
少盡執謝之私此非不肖一人一家之幸也新聞獲

餘數多斟酌區處曲當其可此又甚慰復有合計事宜數件隨啓申布倘被垂察或追來效一此輩往來之地止在高祖廟馬嵬南上官薛廬鎮一帶其南過渭河則祖菴一帶而婁帑寄居則郿縣東南鉄廬菴寨其間若無交契深厚之人何以存住許久時日蓋村野之民不知義理與聞左道之言便乃徹骨相信是以反覆牽連膠固難解而涇陽玄狐教妖人何啻萬數所視以為進退者特在二十一日之舉耳此舉既敗則是數處之人解體過半矣今不預為之計萬一賊勢復合卽不敢復犯城邑而鄉村剽掠之苦何

日可息茲欲以聞上司急為出給告示隨處張貼將連日斬獲之人名姓明白開曉某人常以樊伸妖術術惑謂當做何官職今乃首領不保如此往者靡追來者可戒凡爾各處軍民人等告示到日有為賊黨蠱惑者便宜洗心革故自求多福能將樊伸楊朴張和董漢等有名賊首設計捕獲者卽許免其脅從之罪仍照河南四川首功之例一體陞賞其樊伸等經過地方曾與做飯送酒之人乃一時被其氣焰薰赫雖云法禁有違亦出勢不得已姑且免其究問其壯丁男子為賊捉拿割髮塗面及著名賊簿哄誘脅從

者原係被賊威劫之數比之楊朴等同謀結聚不同  
若能改悟走回許自首到官給與執照令其寧家生  
理其楊朴等果能改悟前愆將樊仲等不拘斬首生  
擒送官投首亦照前例賞功免罪如此則民志自定  
賊勢自孤不待旬日之間諸賊之首悉函官庫矣一  
立賞植信所以勵勇敢勦凶逆之大權也近聞州上  
於諸賊攻城之日大賞射者州中之人人人思奮恨  
不身對賊鋒以收新效今聞立節渡口地方所報二十  
二日辰時賊衆先後二十一騎駐渡索船船丁各行  
走避村民數輩執兵追呼各賊徑西而去趕下馬匹

地方牽來報官姜令卽便賞與以勵其氣諸賊恐追  
兵繼至從列渡徑去雖因往來鉄爐菴寨熟知道路  
淺深然舍舟而涉盖亦深有所不得已其餘黨不數  
百正以事勢窮蹙不能相及以今料之只在州城東  
西及興平一帶舊行道沿村舍憑熟隱匿若出給曉  
諭令各村挨拏呈報除官有定賞外凡所獲賊人一  
應物件不拘馬騾銀兩悉行給與則遠近相傳必多  
奮迅更以隱匿不報與犯人同律召號則勇敢之士  
志向旣專而隱匿之家親疎靡諱不十餘日自首白  
縛者源源而至謂孽蔓猶滋氛祲不消者吾未之信



也一二十三日見州上批廻本縣票帖云賊衆自言去喚所約銀兵及涇陽玄狐教私人復來攻城事之有無雖不可料而備之曲折誠不可踈使賊果如今日烏散而去固已幸矣倘萬一如厥所言則倉卒之際何以為計今宜密切令人先去鉄爐菴寨抓探賊輩何在何往若果招誘銀兵宜申行上司火速移文巡檢于翔令其多方訪邏勦捕翱有令去則山中小寇不惟不敢輒同賊謀抑且別為巡邏搜捕何也伸等皆鄉村游手好閒之人止以妖人誘引扇惑偶至如此山途巖險旣所不關兵事倚伏又安有見自竇

雞至鄜縣牢谷一應山口各請上司指揮所在官司  
督人守把賊必進退兩難束手就斃矣若賊尚在此  
地留滯未發宜密行竇雞把塞隘口截其西奔無移  
盤屋揚兵致邏過其東邁凡武功扶風岐山鳳翔沿  
渭河道但有淺窄可以列渡之處及一應通行行船  
渡口仔細隄防不許擅便放賊北渡乃徐陳師壓境  
依前明加曉諭立賞要成則事更易圖計無不獲矣  
一玄狐教不但涇陽一處咸陽醴泉三原三水淳化  
高陵處處有之但不若涇陽之多耳此教風行二十  
餘年其妖師所至家家事若祖考惟其所需極意承

奉一飲一饌妖師方下筭入口其家長幼大小卽便跪請留福奪去自食至於退處空室則使處女少婦次第問安倘蒙留侍枕席卽為大幸有福其妖師者又令此輩照水鑑形云某後當為何官某後當有何福愚民易惑便爾堅志奉承牢不可解然心旣希有官祿志豈無懷叛逆往歲藍巡撫在陝僕嘗具書備言其事畧云此地十年之後必有大憂宜急為之所藍公星夜取知縣劉仲和至分付區處顧仲和不諳事體曉諭無方致此輩托求太府反謂官司生事乃其官司亦不能禁矣而此輩方且深根固蒂聚貨通

官打點承對搖手一呼應者千計兩生員楊芝恐貽害  
地方具呈巡撫衙門發縣跟究以官以受重賄將欲  
故勘復畏人言竟以他事致芝以死此後雖有豪傑  
敢言之士閉口不敢矣今欲悉行處置則干碍人衆  
不若申達上司但摘其為首之八二三十輩斬首號  
今則愚民將曰彼嘗照水見有衙官今輒遭此方來  
復有是人行妖蠱惑雖平日為深信者亦不信矣此  
其陰騭於民奚啻萬萬哉一此賊既行叛逆攻犯城  
池上司將必加兵搜勦所過地方不無玉石俱焚之  
憂宜曉諭各處鄉村鎮店屯寨軍民人等急為修建

垣堡立柵置兵警至則聲鑼相援軍來則列兵示備  
不惟賊衆見之寒心而要功之徒亦無所肆其志意  
矣一山東響馬四川保兒皆深根巨盜攻剽慣熟之  
人比之此輩實有徑庭各處鄉村之民聞其聚衆攻  
城曾未見彼技能何似便乃深自疑畏甚至婦子離  
散產業蕩棄地方生事之人又復乘機劫奪財物若  
不反復曉告令與近村之人自相保助不許擅離本  
地不拘反賊及乘機之賊併力擒捕依前送官給賞  
則外賊不惟易獲而內地復難驚潰此又計之所宜  
先者不可不慎也

答德克上書

白七弟昨晚且寢矣覽爾所上書深有意致卽爾不知吾意所在然其言自多愛敬此正吾弟事欣然終日且知弟由是以往能改過亮德也益大喜飲酒數盃至大醉卧矣恐爾不知吾樂故以此告爾

對山集卷之二十二